



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 25. Pravilnika o godišnjim finansijskim izvještajima političkih stranaka (“Službeni glasnik BiH” broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2012. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2012. **STRANKE ZA BOSNU I HERCEGOVINU**

Broj: 03-07-6-715/13  
Sarajevo, 21. juli 2014. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije.....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	6
5.1. NALAZI.....	6
5.2. PREPORUKE.....	15

## **MIŠLJENJE REVIZORA**

Služba za reviziju finansiranja političkih stranaka izvršila je reviziju godišnjeg finansijskog izvještaja Stranke za Bosnu i Hercegovinu za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Rukovodstvo stranke je odgovorno za finansijske izvještaje, postupanje u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i člana 15.10 Izbornog zakona BiH, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Smatramo da revizija koju smo izvršili pruža razumnu osnovu za izražavanje našeg mišljenja.

**Utvdili smo da Stranka za Bosnu i Hercegovinu u izvještajnom periodu nije postupila u skladu sa odredbama člana 6., člana 8. stav (1) i člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.**

**Prema našem mišljenju, osim navedenog, revidirani finansijski izvještaj ukazuje da je Stranka za Bosnu i Hercegovinu u 2012. godini postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Stranke za Bosnu i Hercegovinu za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2012. godinu, Stranka za Bosnu i Hercegovinu je iskazala prihod u iznosu od 1.044.407,19 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	17.267,60	1,65%
2	Prilozi fizičkih lica	45.653,81	4,37%
3	Prilozi pravnih lica	26.256,75	2,51%
4	Prihodi od imovine	1.507,37	0,14%
5	Prihodi od pr.lica	0,00	0,00%
6	Prihodi od poklona	1.870,56	0,18%
7	Prihodi iz budžeta	951.851,10	91,14%
8	Ostali prihodi	0,00	0,00%
	<b>Ukupni prihodi:</b>	<b>1.044.407,19</b>	<b>100,00%</b>

Prema podacima iz godišnjeg finansijskog izvještaja, Stranka za Bosnu i Hercegovinu je ostvarila rashode u iznosu od 1.448.408,43 KM<sup>1</sup>.

## 2. PREDSTAVLJANJE POLITIČKE STRANKE

Naziv političke stranke: Stranka za Bosnu i Hercegovinu. Skraćeni naziv stranke: SBiH.

Stranka za Bosnu i Hercegovinu upisana je u registar političkih organizacija kod Višeg suda u Sarajevu, rješenjem broj: R-I-2/96 od 25.04.1996. godine.

Sjedište političke stranke je u Sarajevu, Trg Fra Grge Martića 2/II.

Lice ovlašteno za zastupanje stranke je Haris Silajdžić, predsjednik, a ovlašteno lice predsjednika je Amer Jerlagić.

Lice ovlašteno za podnošenje finansijskih izvještaja za 2012. godinu je Salem Halilović.

<sup>1</sup> Podaci iz korigovanog obrasca 4 (ukupni rashodi političke stranke) godišnjeg finansijskog izvještaja za 2012. godinu, koji je dostavljen dana 04.09.2013. godine.

Prema podacima iz godišnjeg finansijskog izvještaja za 2012. godinu, organizacionu strukturu Stranke za Bosnu i Hercegovinu čine:

- Centrala SBiH,
- 9 kantonalnih vijeća,
- Gradski odbor Mostar,
- 72 općinska savjeta/odbora,
- Žene Stranke SBiH,
- Klub poslanika SBiH u Parlamentu Federacije BiH,
- Klub poslanika SBiH u Parlamentarnoj skupštini BiH,
- Mladi SBiH i
- Fondacija SBiH.

### **3. OPIS REVIZIJE**

**Predmet revizije** je godišnji finansijski izvještaj Stranke za Bosnu i Hercegovinu za 2012. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine i to sljedećih organizacionih dijelova političke stranke:

- Centrala SBiH Sarajevo,
- Općinski savjet SBiH Stari grad Sarajevo,
- Opštinska organizacija SBiH Banja Luka i
- Općinski savjet SBiH Sapna.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Stranka za Bosnu i Hercegovinu u izvještajnom periodu postupala u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i članom 15.10 Izbornog zakona BiH.

**Obim revizije** finansijskih izvještaja Stranke za Bosnu i Hercegovinu obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta i troškove izborne kampanje.

### **4. PRETHODNE KONTROLE I REVIZIJE**

Služba za reviziju obavila je reviziju i pregled finansijskih izvještaja Stranke za Bosnu i Hercegovinu u periodu od 2004. do 2011. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama.

Nakon izvršenog pregleda godišnjeg finansijskog izvještaja za 2011. godinu, Služba za reviziju je izdala Izvještaj o pregledu godišnjeg finansijskog izvještaja Stranke za Bosnu i Hercegovinu sa mišljenjem revizora, nalazima revizije i preporukama stranci da ne prima zabranjene priloge, da vodi adekvatne evidencije o svojim prihodima i rashodima, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka, te da se pridržava odredaba poglavlja 15 Izbornog zakona Bosne i Hercegovine.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2012. godinu, utvrđeno je da Stranka za Bosnu i Hercegovinu nije ispoštovala ranije date preporuke revizije.

## 5. NALAZI I PREPORUKE

### 5.1. NALAZI

- a) **Stranka za Bosnu i Hercegovinu postupila prekršila je odredbe člana 6. Zakona o finansiranju političkih stranaka, koji je bio na snazi do 04.12.2012. godine.**<sup>2</sup>

Kontrolom blagajničkih izvještaja Općinske organizacije SBiH Banja Luka, utvrđeno je da je dana 10.10.2012. godine jedno fizičko lice u ime Stranke demokratske akcije uplatilo prilog u iznosu od 180,00 KM.

Uvidom u godišnji finansijski izvještaj, utvrđeno je da Stranka za Bosnu i Hercegovinu nije prijavila ovaj prilog, čime je prekršila odredbe člana 6. Zakona o finansiranju političkih stranaka, koji je bio na snazi do 04.12.2012. godine.

- b) **Stranka za Bosnu i Hercegovinu postupila je suprotno odredbama člana 8. stav (1) Zakona o finansiranju političkih stranaka, koji je bio na snazi do 04.12.2012. godine.**<sup>3</sup>

Revizijom je utvrđeno da su odbori Stranke za Bosnu i Hercegovinu koristili poslovne prostorije u vlasništvu općina bez naknade ili po povoljnijim uslovima, čime su prekršili odredbe člana 8. stav (1) Zakona o finansiranju političkih stranaka, koji je bio na snazi do 04.12.2012. godine.

- Općinski savjet SBiH Centar Sarajevo je na osnovu Ugovora o zakupu poslovnih prostorija sa Općinom Centar Sarajevo, broj: 04-49-4-39/09 od 26.05.2009. godine, koristio poslovni prostor površine 66 m<sup>2</sup>, po cijeni koja je ugovorena u iznosu od 1,00 KM po m<sup>2</sup>, uvećanoj za porez na dodatu vrijednost. Prema Odluci o dodjeli u zakup poslovnih zgrada i prostorija Općine Centar Sarajevo ("Službene novine Kantona Sarajevo", broj 20/09), najniža cijena zakupnine u II zoni Općine Centar, gdje se prostorije stranke i nalaze, iznosi 12,00 KM po m<sup>2</sup>.  
Korištenjem poslovnog prostora u periodu od januara do novembra 2012. godine po cijeni nižoj od cijene utvrđene navedenom Odlukom, Stranka za Bosnu i Hercegovinu je primila prilog Općine Centar Sarajevo u iznosu od 7.986,00 KM.
- Općinski savjet SBiH Ilidža je na osnovu Ugovora o zakupu poslovnih prostorija sa Općinom Ilidža, broj 05-23-2113/09 od 07.10.2009. godine, koristio poslovni prostor površine 16,70 m<sup>2</sup>. Cijena zakupa je ugovorena u procentu 10% od početne cijene zakupa od 20,00 KM za extra zonu, u kojoj se poslovni prostor nalazi, odnosno u iznosu od 2,00 KM po m<sup>2</sup>, uvećanoj za porez na dodatu vrijednost.  
Korištenjem poslovnog prostora u periodu od januara do novembra 2012. godine, po cijeni zakupnine ispod tržišne cijene, stranka je primila zabranjeni prilog u iznosu od 3.306,60 KM.
- Općinski odbor SBiH Sanski Most je bez naknade koristio prostor površine 24,00 m<sup>2</sup> u vlasništvu Općine Sanski Most.<sup>4</sup> Obzirom da u skladu sa Odlukom o uslovima i načinu davanja u zakup poslovnih prostorija i poslovnih zgrada na području općine Sanski Most

<sup>2</sup> Član 6. stav (1) Politička stranka dužna je voditi evidenciju o priložima fizičkih i pravnih lica, te izdati potvrdu fizičkom i pravnom licu od kojeg je primila prilog. Član 6. stav (2) Ako ukupni iznos priloga jednog lica iz stava (1) člana 4. ovog zakona premašuje 100,00 KM, ta uplata mora da se unese u finansijski izvještaj u skladu sa članom 11. Zakona o finansiranju političkih stranaka.

<sup>3</sup> U skladu sa odredbom iz člana 8. stav (1) tada tada važećeg Zakona o finansiranju, državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

<sup>4</sup> Akt Općine Sanski Most br.03-23-8-830/13 od 24.04.2013. godine.

(„Službeni glasnik Općine Sanski Most”, broj 4/12 od 05.04.2012.godine), cijena zakupa po m<sup>2</sup> iznosi 10,00 KM za poslovne prostore do 25,00 m<sup>2</sup>, stranka je ostvarila zabranjeni prilog u iznosu od 2.640,00 KM.

- Općinski savjet SBiH Ilijaš je bez naknade koristio prostor površine 19,50 m<sup>2</sup> u vlasništvu Općine Ilijaš.<sup>5</sup> Obzirom da u skladu sa Odlukom o načinu i visini plaćanja zakupnine poslovnih prostora na području općine Ilijaš („Službene novine Kantona Sarajevo”, broj 2/00), najniži iznos mjesečne zakupnine na području ove općine iznosi 8,00 KM, stranka je korištenjem poslovnog prostora za jedanaest mjeseci 2012. godine ostvarila zabranjen prilog u iznosu od 1.716,00 KM.
- Općinski odbor SBiH Gradačac je, bez naknade, koristio prostor površine 40,00 m<sup>2</sup> u vlasništvu Općine Gradačac u zgradi Crvene škole<sup>6</sup>. Obzirom da u skladu sa Odlukom o visini naknade za izdavanje u zakup poslovnih zgrada, prostorija i parkinga cijena zakupa po m<sup>2</sup> iznosi 0,80 KM, stranka je korištenjem poslovnog prostora za jedanaest mjeseci 2012. godine ostvarila zabranjeni prilog u iznosu od 352,00 KM.
- Općinski odbor SBiH Ključ je na osnovu Ugovora o korištenju prostora II diletacije Doma kulture sa Udruženjem građana „Ključki biseri“ iz Ključa, koristio prostorije Doma kulture, površine 52,15 m<sup>2</sup>. Prema podacima koje je dostavila Općina Ključ, prostorije koje koriste političke stranke su u vlasništvu ove općine, te su dodijeljene Udruženju građana „Ključki biseri“ iz Ključa na upravljanje.  
Kako je Odlukom o zakupnini poslovnog prostora na području općine Ključ utvrđena cijena zakupa za poslovni prostor u prvoj zoni od 6,00 KM/m<sup>2</sup>, stranka je korištenjem prostora bez naknade u periodu od januara do novembra 2012. godine ostvarila zabranjeni prilog u iznosu od 3.441,90 KM.
- Stranka za Bosnu i Hercegovinu je na osnovu rješenja Općinskog načelnika Općine Visoko broj: 01/2-02-424/10 od 11.06.2010. godine, koristio bez naknade poslovni prostor površine 45 m<sup>2</sup>, uz obavezu tekućeg održavanja i plaćanja komunalija (grijanje, voda, električna energija).<sup>7</sup>
- Općinski savjet SBiH Tuzla je na osnovu Ugovora o zakupu poslovnih prostorija, broj: 17-23-633 od 15.05.2007. godine, sklopljenim sa Općinom Tuzla, koristio poslovni prostor površine 55,18 m<sup>2</sup> i ostali prostor površine 6,35 m<sup>2</sup>, odnosno ukupne površine 61,53 m<sup>2</sup>. Za korištenje poslovnog prostora ugovorena je cijena od 1,00 KM po m<sup>2</sup>, dok je za ostali prostor ugovorena cijena od 0,50 KM po m<sup>2</sup>, koja se uvećava za porez na dodatu vrijednost. Korištenjem poslovnog prostora po cijeni koja je ispod tržišne cijene, Stranka za Bosnu i Hercegovinu je ostvarila prihod po osnovu nenovčane donacije Općine Tuzla.
- Pored navedenih, poslovne prostore bez naknade su koristili organizacioni dijelovi Stranke za Bosnu i Hercegovinu u općinama: Stari grad Sarajevo, Bosanska Krupa, Fojnica, Jajce, Srebrenica i Jablanica.

**c) Politička stranka je prekršila odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.**

Na osnovu obavljene revizije utvrđeno je da Stranka za Bosnu i Hercegovinu nije uspostavila potpune i tačne evidencije o svojim prihodima i rashodima, niti je godišnji finansijski izvještaj popunila u skladu sa odredbama tada važećeg Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) - u daljem tekstu:

<sup>5</sup> Akt Općine Ilijaš broj: 04/1-14-857/13 od 03.05.2013. godine.

<sup>6</sup> Akt Općine Gradačac br.08/2-31-1118/13 od 29.04.2013. godine.

<sup>7</sup> Akt Općine Visoko br. 01/2-02-244/12 od 25.04.2012. godine sa Rješenjem od 11.06.2010. godine.

Pravilnik, čime je prekršila odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

- (1) Revizijom je utvrđeno da Općinski savjet SBiH Banja Luka nije uspostavio potpune evidencije o svojim rashodima, odnosno nije vodio poslovne knjige u skladu sa propisima o računovodstvu.

Uvidom u finansijsku dokumentaciju utvrđeno je da je ovaj organizacioni dio unaprijed plaćenu zakupninu za poslovni prostor za 2014. godinu u poslovnim knjigama i godišnjem finansijskom izvještaju iskazao kao rashode 2012. godine, dok su troškovi zakupa za 2012. godinu evidentirani 2010. godine, što ukazuje da stranka rashode nije evidentirala u momentu nastanka troška, već u momentu plaćanja obaveze.

- Kontrolom blagajničkih izvještaja OS SBiH Banja Luka, utvrđeno je da su jednom fizičkom licu isplaćena sredstva po osnovu pomoći u iznosu od 200,00 KM, te da su isplaćene naknade za tri posmatrača u ukupnom iznosu od 180,00 KM.

Stranka na sredstva isplaćena fizičkim licima u ukupnom iznosu od 380,00 KM nije u skladu sa poreskim propisima, obračunala niti platila porez na dohodak i pripadajuće doprinose.

Služba za reviziju je, takođe, utvrdila da OS SBiH Banja Luka nije obračunao i uplatio porez na dohodak i pripadajuće doprinose na sredstva isplaćena fizičkim licima koja nisu zaposlena u stranci, po osnovu putnih troškova, dnevnica i po računima za gorivo u ukupnom iznosu od 4.996,36 KM.

Obzirom da OS SBiH Banja Luka nije u skladu sa poreskim propisima obračunao i uplatio porez na dohodak i pripadajuće doprinose na sredstva isplaćena fizičkim licima, troškovi i obaveze po ovom osnovu nisu ni iskazani u poslovnim knjigama i finansijskom izvještaju.

- (2) Općinski savjet SBiH Stari grad je tokom 2012. godine isplatio naknade po osnovu ugovora o volontiranju za 2 fizička lica u ukupnom iznosu od 600,00 KM. Obzirom da u skladu sa Zakonom o volontiranju FBiH, političke stranke ne mogu biti organizatori volontiranja, na sve isplate fizičkim licima koje sa poreskog aspekta imaju karakter ličnih primanja, stranka je u skladu sa poreskim propisima imala obavezu da obračuna porez na dohodak i pripadajuće doprinose.

Isti općinski savjet nije na jednokratno isplaćena sredstva fizičkim licima u ukupnom iznosu od 290,00 KM obračunao niti platio porez na dohodak i pripadajuće doprinose.

- Općinski savjet SBiH Sapna izvršio je isplatu dnevnica i naknada za korištenje vlastitog vozila u službene svrhe članovima i predsjedniku ovog organizacionog dijela u ukupnom iznosu od 478,76 KM. Obzirom da članovi i predsjednik Općinskog savjeta SBiH Sapna nisu zaposleni u stranci, stranka je na sve isplate ovim licima trebala obračunati i uplatiti porez na dohodak i doprinose.

Prema podacima iz poslovnih knjiga, utvrđeno je da Općinski savjet SBiH Sapna, takođe, nije na isplaćene naknade posmatračima u ukupnom iznosu od 800,00 KM obračunao niti platio porez na dohodak i pripadajuće doprinose.

Obzirom da Stranka za Bosnu i Hercegovinu nije u skladu sa poreskim propisima obračunala i uplatila porez na dohodak i pripadajuće doprinose na sredstva koja su isplatili općinski savjeti Stari grad i Sapna fizičkim licima po osnovu naknada, troškovi i obaveze po ovom osnovu nisu ni iskazani u poslovnim knjigama i finansijskom izvještaju.

- (3) Služba za reviziju je utvrdila da SBiH nije u obrascu 2 (pregled prometa svih transakcijskih računa političke stranke) godišnjeg finansijskog izvještaja iskazala tačne podatke o prometu ostvarenom po transakcijskim računima općinskih savjeta Banja Luka, Kalesija, Gornji



Vakuf-Uskoplje, Konjic, Prozor-Rama, Modriča i Jablanica, čime je prekršila odredbe člana 11. Pravilnika.

- Kontrolom izvoda sa transakcijskog računa Općinskog savjeta SBiH Banja Luka, utvrđeno je podaci o početnom stanju, prometu ulaza i izlaza, te saldu na 31.12.2012. godine koji su iskazani u obrascu 2 ne odgovaraju podacima sa izvoda sa transakcijskog računa ovog organizacionog dijela.  
Prema podacima sa izvoda, početno stanje na dan 01.01.2012. godine iznosilo je 46.827,66 KM, promet ulaza 185.150,09 KM, promet izlaza 172.736,72 KM, a stanje na dan 31.12.2012. godine je iznosilo 59.241,03 KM. Stranka je, međutim, u obrascu 2 iskazala početno stanje na dan 01.01.2012. godine u iznosu od 49.252,01 KM, promet ulaza u iznosu od 60.092,00 KM, promet izlaza u iznosu od 35.617,65 KM i stanje na dan 31.12.2012. godine u iznosu od 73.726,36 KM.
- Podaci o stanju i prometu ostvarenom putem transakcijskog računa OS SBiH Kalesija broj: 1321400310551502 koji su iskazani u godišnjem finansijskom izvještaju ne odgovaraju podacima iz izvoda sa transakcijskog računa.  
Stranka je u obrascu 2 iskazala sljedeće podatke: početno stanje na dan 01.01.2012. godine u iznosu od 21,22 KM, promet ulaza u iznosu od 774,30 KM, promet izlaza u iznosu od 1.013,00 KM i negativno stanje sredstava na dan 31.12.2012. godine u iznosu od 217,48 KM<sup>8</sup>.  
Služba za reviziju je izvršila uvid u podatke iz valutne kartice i utvrdila da je početno stanje na ovom transakcijskom računu iznosilo 804,93 KM, ukupan promet ulaza 2.366,42 KM, ukupan promet izlaza 3.166,93 KM, te stanje na dan 31.12.2012. godine u iznosu od 4,42 KM.
- Takođe je utvrđeno da Stranka za Bosnu i Hercegovinu nije iskazala tačne podatke o prometu putem transakcijskog računa OS SBiH Gornji Vakuf-Uskoplje broj: 1011310000099058. Naime, stranka je u obrascu 2 iskazala ukupan promet ulaza u iznosu od 13.900,00 KM i ukupan promet izlaza u iznosu od 13.922,41 KM, dok je prema podacima iz izvoda, ukupan promet ulaza iznosio 16.272,74 KM, odnosno ukupan promet izlaza 16.295,16 KM.
- Stranka za Bosnu i Hercegovinu nije u godišnjem finansijskom izvještaju iskazala podatke o prometu i stanju sredstava na transakcijskom računu OS SBiH Konjic broj: 1020080000034066. Prema podacima iz izvoda, stranka je na dan 01.01.2012. godine na ovom transakcijskom računu imala sredstva u iznosu od 13,09 KM, promet ulaza je iznosio 23.951,29 KM, promet izlaza 23.693,15 KM, te je saldo na dan 31.12.2012. godine iznosio 271,23 KM.
- Kontrolom izvoda sa transakcijskog računa Općinskog savjeta SBiH Prozor-Rama broj: 3060150000408381, utvrđeno je da je početno stanje sredstava na dan 01.01.2012. godine iznosilo 68,81 KM, ukupan promet ulaza 8.773,76 KM, ukupan promet izlaza 8.422,55 KM, te stanje na 31.12.2012. godine u iznosu od 420,02 KM. Stranka za Bosnu i Hercegovinu nije u godišnjem finansijskom izvještaju iskazala podatke o stanju i prometu ostvarenom putem ovog transakcijskog računa.
- Služba za reviziju je utvrdila da stranka nije u obrascu 2 godišnjeg finansijskog izvještaja iskazala stanje i promet ostvaren putem transakcijskog računa Općinskog savjeta SBiH Modriča broj: 5513031129116253. Prema podacima iz izvoda sa transakcijskog računa, stranka je na ovom računu na dan 01.01.2012. godine imala sredstva u iznosu od

<sup>8</sup> Stranka je iskazala saldo u iznosu od 259,92 KM.

2.540,50 KM. Takođe je utvrđeno da je ukupan promet ulaza iznosio 2.278,18 KM, a promet izlaza 4.805,10 KM. Stranka je na dan 31.12.2012. godine na ovom transakcijskom računu imala sredstva u iznosu od 13,58 KM.

- Osim navedenog, utvrđeno je da stranka nije u obrascu 2 pravilno iskazala promet i saldo na transakcijskom računu Općinskog savjeta SBiH Jablanica.

(4) Služba za reviziju je utvrdila da SBiH nije u obrascu 2-1 (pregled stanja blagajne) iskazala tačne podatke o prometu ostvarenom putem blagajni organizacionih dijelova SBiH Stari Grad Sarajevo, Banja Luka i Sapna, čime je prekršila odredbe člana 12. Pravilnika.

- U obrascu 2-1 godišnjeg finansijskog izvještaja stranka je iskazala sljedeće podatke o prometu ostvarenom putem blagajne Općinskog savjeta SBiH Stari grad: početno stanje na dan 01.01.2012. godine u iznosu od 0,00 KM, promet ulaza u iznosu od 19.683,68 KM, promet izlaza u iznosu od 19.358,95 KM i stanje na dan 31.12.2012. godine u iznosu od 324,73 KM.

Uvidom u poslovne knjige utvrđeno je da početno stanje blagajne iskazano u godišnjem finansijskom izvještaju ne odgovara podacima sa analitičke kartice konta blagajne.

Naime, stranka je u poslovnim knjigama iskazala početno stanje blagajne na dan 01.01.2012. godine u iznosu od 2.639,18 KM. Dana 05.01.2012. godine, stranka je nalogom za knjiženje 91 izvršila ispravku početnog stanja blagajne, čime je promet ulaza uvećala za 5.400,00 KM po osnovu poslovnih promjena iz 2010. godine, te je početni saldo blagajne umanjila za iznos 8.039,18 KM, čime je početni saldo u poslovnim knjigama uskladila sa podacima iz blagajničkog izvještaja na dan 02.01.2012. godine. Stranka je, takođe, po osnovu utvrđenog manjka u iznosu od 8.039,18 KM zadužila fizičko lice.

Na osnovu navedenog, Služba za reviziju je utvrdila da stranka nije pravilno vodila blagajničko poslovanje, niti je vršila popis sredstava u blagajni i usaglašavanje stvarnog i knjigovodstvenog stanja, što za rezultat ima pogrešno iskazivanje promet ulaza i promet izlaza u 2012. godini.

Služba za reviziju je, takođe, utvrdila da je OS SBiH Stari grad isplate iz blagajne vršio na osnovu neadekvatne dokumentacije, tj. stranka je umjesto računa za reprezentaciju uz nalog isplate priložila potvrdu o primljenim sredstvima.

- Kontrolom blagajničkih izvještaja je utvrđeno da stranka nije u godišnjem finansijskom izvještaju pravilno iskazala podatke o prometu putem blagajne OS SBiH Banja Luka. Stranka je u obrascu 2-1 finansijskog izvještaja iskazala promet ulaza u iznosu od 4.000,00 KM, odnosno promet izlaza u iznosu od 5.391,00 KM, dok je prema podacima iz blagajničkih izvještaja promet ulaza iznosio 6.910,00 KM, a promet izlaza 8.201,00 KM.

Takođe je utvrđeno da je stranka pogrešno iskazala saldo po blagajničkom izvještaju za jun 2012. godine za 100,00 KM, čime je i saldo na 31.12.2012. godine iskazala u manjem iznosu za 100,00 KM. Prema podacima iz obrasca 2-1 i blagajničkog izvještaja za decembar 2012. godine, stranka je na dan 31.12.2012. godine u blagajni imala sredstva u iznosu od 478,99 KM, dok je kontrolom blagajničkih izvještaja za period 01.01.-31.12.2012. godine utvrđeno da je saldo iznosio 578,99 KM.

- Služba za reviziju je utvrdila da podaci o prometu putem blagajne Općinskog savjeta SBiH Sapna koji su iskazani u godišnjem finansijskom izvještaju ne odgovaraju podacima iz blagajničkih izvještaja.

Stranka je u obrascu 2-1 iskazala sljedeće podatke: stanje na dan 01.01.2012. godine u iznosu od 7.507,96 KM, promet ulaza u iznosu od 70,75 KM, promet izlaza u iznosu od 7.578,71 KM, te stanje na dan 31.12.2012. godine u iznosu od 0,00 KM.

Prema podacima iz blagajničkih izvještaja, početno stanje sredstava na dan 01.01.2012. godine iznosilo je 7.507,96 KM, promet ulaza 5.223,00 KM, promet izlaza 7.578,71 KM, te je stranka na dan 30.11.2012. godine u blagajni imala sredstva u iznosu od 5.152,25 KM. Takođe je utvrđeno da je u blagajničkom izvještaju za decembar 2012. godine, na osnovu naloga za knjiženje broj: 31-12/12 od 31.12.2012. godine, izvršena ispravka knjiženja za 5.152,25 KM, odnosno storniran je ulaz u blagajnu za 5.152,25 KM na teret neraspoređenog viška prihoda. Stranka je u Nalogu za ispravku knjiženja kao obrazloženje za provedena knjiženja navela da je u prethodnom periodu izvršila plaćanje obaveza po računima prema dobavljačima, ali da ista nisu mogla biti evidentirana jer nije raspolagala likvidnom dokumentacijom.

Na osnovu navedenog, mišljenja smo da je stranka utvrđeni manjak sredstava u blagajni proknjižila na teret neraspoređenog viška prihoda, što ukazuje da stranka nije pravilno vodila blagajničko poslovanje, kao i da je isplatila sredstva fizičkom licu, bez odgovarajuće dokumentacije.

- (5) Općinski savjet SBiH Sapna je u obrascu 3-b (prilozi pravnih lica) iskazao prilog pravnog lica „COPYGRAF“ u iznosu od 2.076,75 KM. Kontrolom izvoda i blagajničkih izvještaja, utvrđeno je da Općinski savjet SBiH Sapna nije primio sredstva od ovog pravnog lica. Međutim, uvidom u poslovne knjige utvrđeno je da je OS SBiH Sapna ostvario prihode po osnovu otpisanih obaveza prema pravnom licu „COPYGRAF“ u iznosu od 2.076,75 KM, što je i iskazano u obrascu 3-e (nenovčane donacije i računi koje stranka nije imala obavezu da plati). Obzirom da je stranka prihode po osnovu otpisanih obaveza prema pravnom licu „COPYGRAF“ iskazala i u obrascu 3-b godišnjeg finansijskog izvještaja, ukupni prihodi stranke su uvećani za 2.076,75 KM, čime su prekršene odredbe člana 13. i člana 15. Pravilnika.
- Uvidom u izvode sa transakcijskog računa Općinskog savjeta SBiH Stari grad, utvrđeno je da su na ovaj račun uplaćena sredstva u iznosu od 1.800,00 KM. Takođe je utvrđeno da je sredstva uplatilo Kantonalno vijeće SBiH Sarajevo. Time što je OS SBiH Stari grad u obrascu 3-d (prihodi od dobiti pravnih lica u vlasništvu političke stranke) iskazao sredstva koja je primio od KV SBiH Sarajevo u iznosu od 1.800,00 KM, Stranka za Bosnu i Hercegovinu prekršila je odredbe člana 13. stav (5) i člana 17. Pravilnika.
  - Služba za reviziju je, takođe, utvrdila da su u obrascima 3-e (nenovčane donacije i računi koje stranka nije imala obavezu da plati) godišnjeg finansijskog izvještaja OS SBiH Kalesija i OS SBiH Gradačac iskazane nenovčane donacije Kantonalnog vijeća SBiH Tuzla u iznosima od po 500,00 KM, što je suprotno odredbama člana 13. stav (5) i člana 16. Pravilnika.
- (6) Revizijom finansijskih izvještaja OS SBiH Banja Luka utvrđeno je da je ovaj organizacioni odbor ostvario prihode od kamata po osnovu transakcijskog računa (depoziti po viđenju) u iznosu od 36,75 KM, te prihode po osnovu kamata na oročena sredstva u iznosu od 1.360,44 KM. Obzirom da Općinski savjet SBiH Banja Luka nije u svojim poslovnim knjigama evidentirao prihode po osnovu kamata na oročena sredstva niti je u godišnjem finansijskom izvještaju iste iskazao, prekršene su odredbe člana 13. i člana 16. Pravilnika.

- Takođe je utvrđeno da je Općinski savjet SBiH Sapna u obrascu 3-c (prihodi od imovine) iskazao sredstva koja je primio od KV SBiH Tuzla u iznosu od 964,00 KM, odnosno da je interne prenose sredstava između organizacionih dijelova stranke iskazao kao prihode, što je suprotno odredbama člana 13. stav (5) i člana 16. Pravilnika.
- (7) Revizijom je utvrđeno da Stranka za Bosnu i Hercegovinu nije u obrascu 3-f (prihodi iz budžeta) godišnjeg finansijskog izvještaja pravilno iskazala prihode iz budžeta opština i nije navela nazive nivoa vlasti, čime je prekršila odredbe člana 19. Pravilnika.
- Centrala Stranke za Bosnu i Hercegovinu je u obrascu 3-f iskazala prihode iz budžeta opština u ukupnom iznosu od 309,80 KM, koliko je iskazano i u poslovnim knjigama ovog ograničacionog dijela. Revizijom je utvrđeno da je Centrala SBiH na kontu prihoda iz budžeta evidentirala sredstva uplaćena iz budžeta Opštine Bratunac u iznosu od 149,00 KM, te interne prenose sredstava sa transakcijskih računa općinskih savjeta Doboj Istok i Teočak u iznosima od 67,80 KM, odnosno 93,00 KM.  
Time što je interne prenose sredstava između organizacionih dijelova iskazala kao prihode iz budžeta, Centrala SBiH je uvećala prihode iz budžeta i ukupne prihode stranke za 160,80 KM, čime su prekršene odredbe člana 13. stav (1) i stav (5) i člana 19. Pravilnika.
  - Stranka za Bosnu i Hercegovinu nije u obrascu 3-f iskazala prihode iz budžeta Općine Konjic. Na osnovu podataka koje je dostavila Općina Konjic utvrđeno je da su iz budžeta ove općine Stranci za Bosnu i Hercegovinu isplaćena sredstva u iznosu od 19.216,44 KM, od čega je 16.780,92 KM uplaćeno na transakcijski račun, dok su sredstva u iznosu od 2.435,52 KM usmjerena za plaćanje obaveza po osnovu zakupnine OS SBiH Konjic prema Općini Konjic.
  - Uvidom u izvode sa transakcijskog računa OO SBiH Prozor-Rama, utvrđeno je da je Stranka za Bosnu i Hercegovinu iz budžeta Općine Prozor-Rama primila sredstva u iznosu od 7.473,00 KM. Stranka u godišnjem finansijskom izvještaju nije iskazala prihode iz budžeta ove općine.
  - Na osnovu podataka koje je dostavila Opština Modriča, utvrđeno je da su na transakcijski račun OS SBiH Modriča uplaćena sredstva iz budžeta Opštine Modriča u iznosu od 2.276,20 KM. Uvidom u obrazac 3-f utvrđeno je da SBiH nije iskazala prihode iz budžeta Opštine Modriča.
  - Prema podacima iz izvoda sa transakcijskog računa Općinskog savjeta SBiH Banja Luka utvrđeno je da su ovom odboru iz budžeta Grad Banja Luka uplaćena sredstva u iznosu od 1.255,45 KM. Služba za reviziju je utvrdila da SBiH nije u godišnjem finansijskom izvještaju iskazala prihode iz budžeta Grada Banja Luka.
  - Stranka za Bosnu i Hercegovinu je u obrascu 3-f iskazala prihode iz budžeta Općine Kalesije u manjem iznosu za 1.352,50 KM. Na osnovu podataka koje je dostavila Općina Kalesija utvrđeno je da su iz budžeta ove općine Stranci za Bosnu i Hercegovinu isplaćena sredstva u iznosu od 1.665,50 KM, dok je stranka u godišnjem finansijskom izvještaju iskazala prihode u iznosu od 313,00 KM.
  - Revizijom je utvrđeno da su prihodi iz budžeta Općine Gornji Vakuf-Uskoplje iskazani u manjem iznosu za 2.100,00 KM. Naime, stranka je u obrascu 3-f iskazala prihode iz budžeta Općine Gornji Vakuf-Uskoplje u iznosu od 13.300,00 KM, dok su prema podacima iz izvoda sa transakcijskog računa, iz budžeta ove općine stranci uplaćena sredstva u iznosu od 15.400,00 KM.

- Prema podacima koje je dostavila Opština Kozarska Dubica utvrđeno je da su Stranci za Bosnu i Hercegovinu iz budžeta ove opštine uplaćena sredstva u iznosu od 2.903,94 KM, od čega su sredstva u iznosu od 1.500,00 KM uplaćena na transakcijski račun OS SBiH Prijedor, dok je 1.403,94 KM uplaćeno na račun fizičkog lica, na osnovu zahtjeva. Stranka za Bosnu i Hercegovinu je u obrascu 3-f iskazala prihode iz budžeta Opštine Kozarska Dubica u iznosu od 1.500,00 KM, što je za 1.403,94 KM manje u odnosu na ostvarene prihode.
- Služba za reviziju je na osnovu podataka koje je dostavila Općina Živinice utvrdila da je iz budžeta ove općine na ime Stranke za Bosnu i Hercegovinu isplaćeno 4.500,00 KM. Prema podacima općine, sredstva u iznosu od 4.500,00 su, dana 10.09.2012. godine, uplaćena na račun fizičkog lica. Stranka za Bosnu i Hercegovinu je u godišnjem finansijskom izvještaju iskazala prihode iz budžeta Općine Živinice u iznosu od 500,00 KM, što Služba za reviziju nije potvrdila tokom obavljanja revizije.<sup>9</sup>
- Na osnovu podataka koje je dostavila Vlada Bosansko-Podrinjskog kantona utvrđeno je da su Stranci za Bosnu i Hercegovinu iz budžeta ovog kantona ukupno uplaćena sredstva u iznosu od 6.878,00 KM. Stranka je prihode iz budžeta Bosansko-Podrinjskog kantona u obrascu 3-f iskazala kao prihode iz budžeta Općine Goražde.

Takođe je utvrđeno da Stranka za Bosnu i Hercegovinu nije u finansijskom izvještaju iskazala prihode iz budžeta Opštine Novo Goražde u iznosu od 156,67 KM.

Naime, prema podacima koje je dostavila Opština Novo Goražde<sup>10</sup> utvrđeno je da su dana 20.09.2012. godine na transakcijski račun Kantonalnog vijeća SBiH BPK broj: 101140000289707 iz budžeta ove opštine uplaćena sredstva u iznosu od 156,67 KM.

(8) Služba za reviziju je utvrdila da Stranka za Bosnu i Hercegovinu nije u svojim poslovnim knjigama i godišnjem finansijskom izvještaju iskazala sve troškove nastale u 2012. godini, čime je prekršila odredbe člana 20. i 21. Pravilnika.

- Revizijom je utvrđeno da Općinski savjet SBiH Stari grad nije iskazao troškove telefonskih usluga za decembar 2012. godine u iznosu od 46,45 KM. Takođe je utvrđeno da je Općinski savjet SBiH Stari grad početkom 2013. godine izvršio obračun i plaćanje poreza na dohodak i pripadajuće doprinose na naknade isplaćene posmatračima u 2012. godini u ukupnom iznosu od 1.650,00 KM, tako da su troškovi u poslovnim knjigama iskazani u manjem iznosu za 357,49 KM.
- Općinski savjet SBiH Sapna je u godišnjem finansijskom izvještaju iskazao troškove zakupa poslovnog prostora u iznosu od 600,00 KM. Prema podacima iz poslovnih knjiga zakup je plaćen jednom fizičkom licu za avgust i septembar 2011. godine u iznosu od 300,00 KM, dok je zakup za februar, mart i april 2012. godine u iznosu od 300,00 KM plaćen drugom fizičkom licu. Obzirom da stranka nije dostavila ugovor o zakupu za 2012. godinu, ali da je Općinski savjet SBiH Sapna na ime zakupa za jedan mjesec u 2012. godini isplatio 100,00 KM, te da je stranka u svojim poslovnim knjigama evidentirala troškove električne energije za septembar 2012. godine, mišljenja smo da ovaj odbor nije iskazao troškove zakupa za devet mjeseci 2012. godine procijenjene vrijednosti 900,00 KM.

Uvidom u poslovne knjige utvrđeno je da isti odbor nije iskazao troškove električne energije za oktobar, novembar i decembar 2012. godine.

<sup>9</sup> Služba za reviziju je izvršila uvid u izvoda sa transakcijskog računa OS SBiH Živinice zaključno sa 30.06.2012. godine. Prema podacima iz izvoda br. 1 od 04.01.2013. godine početni saldo sredstava iznosi 48,34 KM, što odgovara podacima iz izvoda br. 7 od 30.06.2012. godine.

<sup>10</sup> Akt Opštine Novo Goražde broj:02/6sl/13 od 10.09.2013. godine.

- Revizijom je utvrđeno da je Stranka za Bosnu i Hercegovinu u godišnjem finansijskom izvještaju iskazala troškove zakupa poslovnih prostora u manjem iznosu u odnosu na ugovorene cijene zakupa za sljedeće organizacione dijelove: OS Prozor-Rama u iznosu od 2.400,00 KM, OS SBiH Konjic u iznosu od 2.435,52 KM, Vijeće stranke Brčko Distrikt u iznosu od 770,00 KM, OS Gornji Vakuf u iznosu od 4.200,00 KM, OS Donji Vakuf u iznosu od 1.000,00 KM, OS Bužim u iznosu od 1.800,00 KM, OS Novi grad Sarajevo u iznosu od 2.820,00 KM, OS Kiseljak u iznosu od 660,00 KM, OS Novo Sarajevo u iznosu od 1.500,00 KM, OS Gradačac u iznosu od 267,00 KM, OS Kakanj u iznosu od 1.107,66 KM i OS Novi Travnik u iznosu od 175,50 KM.

(9) Služba za reviziju je utvrdila da je stranka dio troškova koji se odnose na troškove kampanje iskazala u obrascu 4-1 (režijsko-administrativni i ostali troškovi) godišnjeg finansijskog izvještaja, čime je prekršila odredbe člana 20., 21. i 22. Pravilnika.

- Općinski savjet SBiH Sapna je u obrascu 4-1 iskazao troškove emitovanja oglasa po računu dobavljača d.o.o. Za informisanje „Glas Drine“ Sapna u iznosu od 65,05 KM. Kontrolom je, takođe, utvrđeno da je Općinski savjet SBiH Stari grad troškove štampanja letaka po računu „Nezavisnih novina“ broj: 70-5126/2012 od 24.09.2012. godine u iznosu od 468,00 KM umjesto u obrascu 4-2 (troškovi propagande) iskazao u obrascu 4-1 ovog odbora. Obzirom da se radi o troškovima predizborne kampanje, stranka je navedene troškove trebala iskazati u obrascu 4-2 godišnjeg finansijskog izvještaja.
- Kontrolom izvoda sa transakcijskog računa Općinskog savjeta SBiH Modriča, utvrđeno je da je ovaj odbor dobavljaču „Grafički studio ZR“ Gajić Mladen za usluge štampanja predizbornog materijala platio ukupno 1.673,10 KM. Uvidom u obrazac 4-2 godišnjeg finansijskog izvještaja utvrđeno je da stranka nije iskazala troškove propagande.

(10) Revizijom je utvrđeno da Stranka za Bosnu i Hercegovinu nije u obrascu 5 pravilno iskazala svoje obaveze, odnosno da obrazac 5 nije popunjen u skladu sa odredbama člana 23. Pravilnika.

- Centrala SBiH je u obrascu 5 na dan 31.12.2012. godine iskazala obaveze u ukupnom iznosu od 129.268,54 KM. Stranka, međutim, u obrascu nije iskazala obaveze prema dobavljačima po svakom dobavljaču pojedinačno, već samo u zbirnom iznosu. Služba za reviziju je utvrdila i da stranka nije vršila usaglašavanje obaveza sa dobavljačima, tako da u poslovnim knjigama iskazuje i obaveze za koje je po zakonu nastupila zastara.<sup>11</sup>
- Prema podacima koje je dostavila Služba za zajedničke poslove organa i tijela Federacije BiH, utvrđeno je da obaveze Stranke za Bosnu i Hercegovinu na dan 31.12.2012. godine prema Službi iznose 83.789,51 KM, i to: obaveze za zakup poslovnog prostora u iznosu od 83.300,00 KM i obaveze po osnovu električne energija i vode u ukupnom iznosu od 489,51 KM. Stranka za Bosnu i Hercegovinu je u svojim poslovnim knjigama iskazala obaveze prema Službi za zajedničke poslove organa i tijela Federacije BiH u iznosu od 502,02 KM.
- Općinski savjet SBiH Stari Grad je u obrascu 5 iskazao obaveze na dan 31.12.2012. godine u iznosu od 13.654,00 KM, dok prema podacima iz poslovnih knjiga obaveze ovog odbora iznose 18.069,51 KM.

<sup>11</sup> Stranka na dan 31.12.2012. godine iskazuje obaveze prema dobavljaču „Herceg-Tisak“ iz 2002. godine u iznosu od 9.140,00 KM, te obaveze prema dobavljaču „Bosna Auto“ iz 2000. godine u iznosu od 2.376,00 KM. Stranka nije izvršila usaglašavanje obaveza sa navedenim dobavljačima.

- Općinski savjet SBiH Banja Luka nije u poslovnim knjigama vodio evidencije o obavezama prema dobavljačima, te nije u godišnjem finansijskom izvještaju iskazao obaveze prema dobavljačima na dan 31.12.2012. godine u iznosu od 182,10 KM.

### **Troškovi izborne kampanje**

Stranka za Bosnu i Hercegovinu je postupila u skladu sa odredbama člana 15.10 Izbornog zakona Bosne i Hercegovine, odnosno u svrhu izborne kampanje potrošila je 286.160,05 KM.

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>12</sup> po biraču u svakom izbornom krugu, prema broju birača koje je objavila Centralna izborna komisija Bosne i Hercegovine.

Prema podacima Centralne izborne komisije Bosne i Hercegovine, Stranka za Bosnu i Hercegovinu je u svrhu izborne kampanje, na osnovu broja birača, mogla potrošiti 873.491,15 KM.

## **5.2. PREPORUKE**

*Preporučuje se Stranci za Bosnu i Hercegovinu da se pridržava odredaba Zakona o finansiranju političkih stranaka i poglavlja 15. Izbornog zakona Bosne i Hercegovine, a posebno na osnovu uočenih nedostataka se preporučuje:*

- *da u finansijskom izvještaju prijavljuje sve priloge,*
- *da se ne finansira iz izvora koji su političkim strankama zabranjeni Zakonom o finansiranju političkih stranaka,*
- *da vodi potpune evidencije o svojim prihodima i rashodima i*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

*Takođe se preporučuje:*

- *da prihode i rashode priznaje u momentu njihovog nastanka, a ne u momentu naplate ili plaćanja,*
- *da definiše postupke i procedure internih kontrola vezanih za proces trošenja finansijskih sredstava,*
- *da poštuje i druge propise, prevashodno poreske, iz kojih proističu dodatne obaveze i troškovi,*
- *da vrši godišnji popis imovine i obaveza,*
- *da, u što kraćem roku, utvrdi stvarno stanje svojih obaveza i izvrši odgovarajuća knjiženja u svojim poslovnim knjigama, i*

---

<sup>12</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

- *da poslovanje blagajne uredi na način da se razgraniče dužnosti odobravanja isplate, evidentiranja i isplate gotovine, odnosno da evidentiranje isplata iz blagajne u poslovnim knjigama vrši na osnovu ispravne dokumentacije (npr. potpisani nalog uplate i nalog isplate; putni nalozi ili ovjereni računi za isplatu).*

#### **KOMENTAR:**

U ostavljenom roku, Stranka za Bosnu i Hercegovinu nije dostavila primjedbe na Preliminarni izvještaj o reviziji godišnjeg finansijskog izvještaja za 2012. godinu i postizbornog finansijskog izvještaja-Lokalni izbori 2012. godine.

Zahvaljujemo se ovlaštenom licu za finansijske izvještaje i zaposlenim u Centrali Stranke za Bosnu i Hercegovinu na dobroj i korektnoj saradnji tokom obavljanja revizije finansijskih izvještaja.

Šef Odsjeka za revizijske poslove  
Sanja Tošović, revizor

Šef Službe za reviziju  
mr.sc. Hasida Gušić

Revizor  
Nevenko Andan